



金陵鎖事

漫士周 暉吉父著

華宇張文暉孚之校

寄宇顧端祥孝直校

二京賦

御史余公光號古峯有二京賦嘉靖十五年已經進呈

聖旨送入史館賞新鈔一千貫大城山樵

盛時泰嘗曰孟堅當卯金末造猶以兩都
擅名太冲遭列國鼎分尚藉三都振響今
聖明混一天地再闢列聖相承重光累洽
文物之盛亘古無前奈何使豎儒專美千
載也因爲二京賦期上之惟藏笥中竟歸
覆瓿矣又長史黃琮字元質有金陵賦

佳句

孫總制炎字伯融遊仙云天與數書皆鳥

跡身留一劍是龍精

周滇字伯寧舟中望九華云巖回氣如熾
峰去勢猶引

楊翮字子舉遊廣教寺云雲間聞梵語烟
外聽齋鐘

夏煜字允中康郎山奉旨云絕壁秋聲
清漱玉白沙月色爛堆銀

史京兆謹字公謹七星關云路遠家難問

愁多酒易醒西山精舍云礪戶蜂留蜜松
巢鶴墮翎遊清涼寺云古徑依山轉清猿
向晚哀覽秀樓云殘霞擁樹作秋色空翠
襲衣生暮寒送屠先生云南浦斜陽芳草
色東風啼鳥落花天日晷爲張布政賦云
靜迥青春回禁柳暗移白髮上朝簪萬松
軒云秋聲出樹曉無迹雲氣入簾風滿庭
遊天界寺云地煖漸生眠鹿草松枯欲折

掛猿枝贈吳羽士云松下剪雲縫鶴氅花
間滴露寫鵝經

馬俊贈王鼎歸田云幽齋藏島嶼深徑入
林巒江行云霜蒲藏水鳥煙樹隱柴荆和
杜云翠微深見寺綠野暗啼鶯山居云溪
畔游魚吹柳絮竹邊啼鳥避茶煙

湯叅將胤勣字公讓漫興云長身惟食粟
老眼漸生花詠守宮云鴛鴦腸斷魂堪冷

瑣事卷二
三
蜥蜴形消血未乾秋思云決明堦下好顏
色郭索沙邊多路岐

蔣主孝字宗倫長嘯云重陰接海蒸沙雨
輕霧連山煑石雲

蔣主忠字存恕經龍潭舊居云古鎮東西
市長江旦暮潮過鎡公方丈云寶殿迴臨
飛鳥上疎鍾遙隔暮雲深

蔣御史誼字宗誼八歲賦詩云青天閣雨
雲歸岫紫氣乘龍水入江

顧教授言字如綸題畫云沙上閒鷗如有
約堤邊幽草不知名

賀山人確字存誠城南雅集云開簾山納
翠掃徑樹留陰都門送別云花落謾驚春
已去愁來恰值酒初醒

史山人忠字廷直偶成云爽氣催詩興涼
風散酒時又云雲山開畫障槐柳映蓬門

李祭酒時勉送僧云柳帶天邊雨松回巖
際雲草亭宴集云一徑濃花發滿庭芳草
多送王教授云水滿滄江楊子渡雲連綠
樹富春山

倪尚書謙字克讓南郊草堂云林鳩喚雨
山光暝畦稻舒花水氣香

倪尚書岳字舜咨芳池春水云新漲受風
牽翠縠好山隨月墮青螺登兜率巖云晴

色撲簾知日近輕陰過檻覺雲低和鳴治
有懷云幽壑雨晴泉響近隔林風細鳥飛
輕

童尚書軒字士昂九日云黃菊酒香人病
後白蘋風冷鴈來初南坡草堂云草堂夜
雨生科斗花逕春風叫栗留

李應禎和吳匏庵云春樹暮雲無限思薰
爐茗椀有餘清

沈僉事鍾字仲律黃縣云秋殘羣木老野
迴亂山高題畫云江山秋色淨風雨暮寒
多新嘉驛云風定涼生樹庭空月近人鉅
野云沙草釀寒殘雪在野雲翻影斷鴻懸
青陽驛云寒凝簾底爐烟細塵淨墻陰竹
色幽

徐僉憲完字用美送何省叔還京口云霜
冷江涵秋鴈影雨晴岸拍晚潮聲湖山樓
云窻含山色晴橫黛簾捲湖光晚映霞

姚太守黼字大用報恩訪僧云松雲晴覆
地花雨晝飛空送人還金臺云舟從江上
發人向日邊還淮陰夜泊云燈影遙臨岸
月光低近城旅館歲暮云凍雲低欲墜遠
鴈斷還聯送周別駕云將雛檣燕留人語
衛足葵花向日妍鳳臺別墅云花深門徑
人稀到簾捲春風燕自來北山吟云瀑布

瓊事卷二
六
飛空千尺雨春風吹老一庭花春暮云紅
雨落殘清晝永黃鶯啼盡綠陰稠

羅大理輅字質甫花巖寺云山色遠含千
古秀洞門深向半巖開

王尚書敞字漢英渡大同江云花明春欲
暮沙暖水生煙登浮碧樓云石磴斜通郭
煙村半掩扉宿碧蹄館云樹緣入夏重陰
合鳥爲留人着意啼

張學士益字士謙映草簾云捲露來春燕
搖風入晚螢綠筠云潤含春嶂雨陰送午
窻涼秋夜云露寒蛩韻切雲淡月光微文
會圖云簾捲高松蒼雪墮窻開羣岫翠屏
寒

羅太守鳳字子文九華遇雨云凌霄縹緲
牽高興入夜淋漓負夙期

向知州黷字序伯登下鍾寺云危磴苔封

滑虛壇草色幽中秋泛月云風動魚龍吹
沸浪露寒蟾兔泣清秋集會仙樓云逐江
芳草自生態遶陌繁花偏冶顏

朱山人字字子容弘濟寺次韻云望中峯
翠雲遮斷座裏花香風送來

方山人憲號聽泉弘濟寺云雲出曉堂龍
去遠雪殘晴樹鳥啼新重游弘濟寺云五
更江色渾無夜二月梅花別有春又云數

聲啼鳥林中曉萬樹桃花洞裏春

景司業暘字伯時憶蔣水部云雲竹晴還
雨風花落更飛石駙馬山庄云移席伶歌
歇貪杯較句遲送唐汝立云潮聲翻石壁
山色入虛樓送沈華父云情深惟縱酒髮
亂似驚秋夜酌對曹十四云風簾分坐月
皎皎夜榻剪燭花紛紛遊永寧寺云竹陰
到午風猶冷石磴穿雲路轉幽

陳指揮鐸字大聲齋居云晚樹低分霽春
雲淡隔城夜往新豐鄉云山月巧窺人影
瘦夜涼先向客衣生送毛都督云刁斗夜
嚴山月冷旌旗晴散野雲平

劉尚書麟字元瑞贈吳隱君云七步似曹
常醉後五言逼杜少愁時和張石川云省
已正愁題鳳字忘形翻得換鵝書

朱山人實字子元弘濟寺次韻云花霧拂
簷濃似雨柳風春浪怒於雷又云雨開素
練波光淨雲揭青屏岫色新

馬郎中璫字公信曉行云馬蹄入樹鳥夢
墮月色滿橋人影來

陳副使欽字諒之送外兄北上云長風萬
里興芳草一春愁

金秀才琮字元玉丹陽道中云朝霞推日
出陰壑帶冰流雨泉煮茗云細浪捲風生

蠓眼怒濤翻月起龍腥

伊僉事乘字德載游寺云野鶴盤雲下清
風挾水涼落花云銀塘水泛魚吹沫華屋
泥香燕補巢

梅明府純字一之舟中卽事云雨深煙寺
晚風急海門秋

李副使熙字師文秋興云秋深茅屋鳴寒
杵月上山城起暮鴉又云風急暮雲聞斷

鴈雨晴沙渚泛雙鷗

顧尚書璘字華玉通城山中赴岳陽云石
出泉爭響林幽樹漫生小江口云興在煙
霏際年銷馬跡中飲柳山上云江橫羣水
合野闊萬峯開山中晚興云飲牛臨古澗
射雉出平田送人還京云衣隨行處敝劍
就醉中看登清涼山云古寺頻來僧盡老
重陽欲近蠓爭肥擬宮怨云御前却輦言

無忌衆裏當熊死不辭又云君王自信圖
中貌靜女虛迎夢裏車

顧副使瓌字英玉曉行云鴉翻初日動馬
過斷水妨快雨有述云片雲生晝暝急雨
淨高天夜渡黃巖江云水國寒多眠未穩
城霞路近夢先通孟有涯載酒息園云驚
鴉忽翻庭露下暗螢時度水煙深送羅侍
御還南京云心同江月隨君遠家在秦淮

得信稀

顧貢士嶼字懋涵白牡丹云玉妃罷醉春
無暈素女凌波夜有香天闕山云山深六
月藏寒霧地迥諸天散曉鐘

顧秀才應祥字孝符過龍山別業云雲起
移山色風鳴亂鳥音江上曉行云曉行江
路月人語夜船燈送朱子价云人去天涯
春草綠望迷江上暮煙平遊栖霞寺云流

泉激石常飛雨靈草經寒不斷香除夕云
今宵對雨娛殘歲明日逢人說去年登樓
云宮闕半從雲裡出山光多自雨餘來
謝山人承舉字子象遊寺云深林下馬蒼
苔滑野寺入門秋爽多又云春雨洗山諸
寺近秋花薰夢一樓空病中苔華玉云山
與詩肩齊聳瘦菊隨病眼對爭開
謝布政少南字應午楊少室自粵入賀云

月出煙中樹星窺水面舟嚴子陵釣臺云
故人不預興亡事太史空勞處士猜十六
夜少室右史招宴云尊前寶炬留明月簾
外金花綴綵雲

龍僉憲霓字致仁姑蘇道中云野鶴巢難
定春蚕蠶自忙飲東麓亭云墩傳往昔名
空在劍化何年氣尚浮寒夜飲里中諸公
云氣回簷雪蝟還細雨濕樓煙重不飛

管檢校景字子山遊幕府寺云秋色霜中
樹寒聲雨後潮又云峯斷青蘿合江空白
練長秋陰云風隨黃葉亂雨逐黑雲來

金舉人大車字子有楷上人山亭云敗葉
秋皆墮寒煙晚欲無幽興云放棹晚潮至
開門春草生

金秀才大輿字子坤遊城南諸寺云黃葉
喧高樹青山起夕煙固湖城云山城晴自

濕水國晚多寒

徐山人霖字子仁泊楊青驛云雲輕難掩
月海近易通潮冬遊虎丘云凍鳥自高樹
寒梅或背巖歸舟漫興云覽鏡愧難留黑
髮當杯狂欲醉青山

王參議徽字尚文舟中夜雨聞鴈云淒涼
應帶雨悲咽爲兼風題王子成壁云雨過
苔侵壁潮來水到門登大觀臺云秋聲帶

葉翻林下暝色隨雲渡水來

王太僕韋字欽佩秋日游城南云寒花散
幽馥午樹結團陰秋居雜興云閒行無剩
事孤坐有餘思寄羅敬父云尊前花氣風
生席湖上簫聲月滿船西堂偶興云一春
人醉斜陽裏三月鶯啼細雨中秋日卽事
云梧桐月上風初到蟋蟀聲中雨漸涼
王秀才逢元字子新對酒云潦倒不忘桃

葉句蕭間應戀竹皮冠

張士瀾字心文秋郊云野梅當澗落山鳥
隔花鳴

李明府曉字子晦江上望金山云濤聲風
外壯雲影日邊輕滄州道中云斷靄斜陽
迷去鴈平堤古木集寒鴉春寒夕景云山
腰繞樹嵐初起天末輕陰日欲沉

周尚書金字子庚過楊六郎城云山河未

改豪華盡夷夏平分草樹迷涉忽都河云
極浦遙山無去鴈古城荒堞有啼鴉

許山人鎧字彥明秦淮步月云踈鍾城外
寺曲檻水邊樓晚泊昆陵云西風踈鴈陣
斜日變山容

許太常穀字仲貽何元朗移居云買得曲
池堪鬪舄種成芳樹好藏鶯集沈大理云
簷前香篆將花氣院外松風雜鳥聲

胡副使汝嘉字懋禮過黃華山云林鴉翻
暝色巖樹駐秋雲嘯臺云淡雲千里色落
日半巖陰

王太守可大字元簡壽州渡河云沙淨空
山雨風香野岸花

沈御史越字中甫風雨憶城南杏花云濕
雲帶暝酣清晝芳草含煙靚綠苔冬日諸
君集樓上云待臘江梅初抱萼凌霜籬菊

尚留妍

陳太僕沂字魯南遂初齋云苔痕雙屐齒
花影半簾鉤經牛首山寺云鳥聲林葉暗
山影石溪寒入西山云山出曉雲亂鳥鳴
春日遲燕集西園云煙橫邨遠近月出樹
扶疎永福寺晚眺云峯巒樹色初晴後樓
榭煙光欲暮時

陳同知時伸字元晉試燈夕得樓字云火
樹參差人影亂香煙繚繞月光浮

陳明府時萬字孟錫元宵大雪云人間矜
火樹天上放冰花登大觀亭云帆開二水
天逾濶雲盡三湘鳥共低

張坐營鵬號竹渠登水雲亭云月明江似
洗波動石如浮

張指揮維字管文官舍夜懷云風穿燈影
亂寒逼鴈聲高

楊貢士希淳字道南除夕云酒能扶病客
春欲傍愁人秋曉述懷云病常歆枕晝猶
夢瘦不禁秋雨更寒潯陽阻風過海天寺
云地隣彭澤懷陶令山枕匡廬憶遠公牛
首云去日僧非憐我老舊遊人遠得書難
鄭侍御濂字師周送鄉人歸云江空秋鴈
影砌冷夜蛩聲疏請歸省云寒鴈投陽書
未寄秋風報冷客先知

鄭推府河字師程至江上云愁客難爲別
閒雲漫不開又云天地水爲際江山雪滿
樓

羅主簿燾字元溥晚過東山寺云聞鐘知
寺近逢鹿覺山深宿高座寺云月來半榻
寒松影風送滿山秋葉聲

陳明府芹字子野寄玄超云水邨寒氣早
山館月明孤焦山云煙橫沙市遠船過海

門稀遊靈谷寺云重簷捲霧青欲滴曲水
穿雲淨可憐與諸友集姚園云奕散青林
寒日墮歌翻白雪凍雲高

李郎中逢陽字維明關廟云志許乾坤合
身先吳魏亡

楊秀才穀字惟五宿大城山庄云隔樹林
穿暮披榛徑轉微又云敗壁青苔應磔雨
寒潭碧水似澄霜

黃驗封甲字首卿陳氏園亭云曲徑沿溪
入踈峯帶雨青春日云鳥聲侵夢斷竹色
映堦虛秋興云山高月出鴈初下水遠天
空人自愁天寧寺云短劍孤懸凌夜月敝
裘初紉薄秋風

馬明府應龍字呈道和杜秋興云興發新
秋翻宋賦捲吹蘆葉擬胡笳

張副使鐸字鳴治宛馬云盤旋風欲動拂

拭雪仍迷

陳僉事鳳字伯羽寄題石塘云波閒先受
月池迥不驚鷗臘日云沙白常含凍雲昏
易作陰

高汝州遠字近思泊舟對月云風清沙岸
淨月滿浪花圓弘濟寺云江豚吹浪出還
沒野鷺得魚棲復驚

臨淮侯李言恭字惟寅小桃源云山折路
疑盡花深鳥自藏暮投伏城驛云亂水斜
穿徑空山曲抱邨送安茂卿南還云夢回
芳草遠人去落花多

朱沅州衣字正伯神策城樓望玄武湖云
湖光盪雲日山色印寒流登弘濟江閣云
孤帆蕩漾緣何事遠岫依微莫辨名

景山人霽字光甫山寺避暑云紅塵朝易
夕綠蔭夏疑秋又云篆煙縈佛牖雨氣暗

雲峯

吳侍郎自新字伯恒神策城樓望玄武湖
云樹色含風冷溪聲帶雨寒湖陰夜泛云
九天忽駕冰輪出萬里遙瞻玉鏡開

馬山人光靈字一卿漫興云風微魚淺戲
泥煖燕先知又云疏雨長虹斷遙山積翠
微

何參議汝健字體乾秋雨晚晴云餘霞明

反照疎柳淡輕煙暮春鴻石園云坐久花
香細談深鳥語幽灌園云天涯飛鳥外人
事落花初宿牛首云山色有無朝雨後江
光隱見夕陽時竹素園漫興云花片飛來
情自愜松陰結處坐偏深雪夜次韻云檻
外冰花侵履跡庭前竹翠濕人衣

何御史淳之字仲雅別陳師宗伯云潮痕
迎雨急帆影帶煙過曉川云月瀉空潭水

霞餘幾樹楓登繁臺云斜日窺疎雨歸鴻
綴遠天無題云雲連楚岫還輕散潮向潯
陽總未通秋日李王孫園亭云清光曲引
秦淮水紫氣飛來鍾阜峰

顧居士源字清父燕子磯云淺沙披月蚌
高浪出風豚虎洞小庵云石冷燈無焰香
消火尚薰山寺晚歸云散策衝寒翠峩裳
踏晚晴

金山人鑿字在衙徐太傅園云楊柳晚風
靜芙蓉秋水香悼梁姬云江梅空索咲湘
竹自成斑靜海寺云長風吹老樹斜雨過
疎籬次通津驛云風輕雲氣薄月淨水光
寒北河道中云歸鳥亂啼原上樹夕陽多
在水邊邨送李谷陽云客中候曉霜如月
馬上逢春草似煙夢崔云竊歸靈藥三山
月吹落榆花一笛秋岳少保墓云臨危叩

瓊事卷二
馬書生口立主班師宰相心憶江南云風
簷聽竹心先碎雨檻移花夢亦香

馬明府汝徯字誠望新秋云明月半窗能
自至白雲滿榻似相留秋日永寧庵社集
云山色遙連秦樹碧溪聲常帶梵鐘幽

姚鴻臚淞字元白聞鴈云數聲風處斷孤
影月中翻顧孝符見過云旅懷秋欲盡鄉
思客初來贈周文美云燕市風霜凋客鬢

越山兵燹限河梁

姚太學之裔字玄胤喜諸君子入社云寒
花照座金爲蕊明月窺簾玉作鈎冶城餞
吳莫魏張四子云黃金舊鑄雙龍劍白雪
新傳四傑才

姚太守汝循字叙卿綺霞閣小集云酒邊
過白鳥鏡裡出青山浪禪房云閒花苔上
落踈磬雨中沉送胡懋誠云離愁隨草長

別淚迸鶯啼江南春游云宿雨青郊潤和
風白袷輕題江淑垂綸卷云羊裘雙短髻
蝦菜一扁舟邀笛閣云岸柳秋清夜汀葭
月白時和幼安泛秦淮云潮起輕風生遠
浦夜涼明月滿扁舟

宋兵憲存德字惟一叨轉南曹述懷云櫪
下驪駒淹歲月庭前蒼檜飽風霜

焦明府瑞字伯賢謝公墩晚眺云夜雪萬
家鴻影度江聲千里岸痕高後湖云無數
鷗鳧天上下幾重樓閣樹高低

盛貢士時泰字仲交登賓峯樓望雨云一
徑穿雲上千山送雨來天界寺云松聲寒
遶塔竹影午過墻三茅峯云鳥飛青嶂外
人語白雲中幽棲寺云鍾阜斷雲連古戍
秣陵黃葉下西風集瞻雲樓云林下捲帷
涼欲度花邊迎扇暑將無試燈夕讌瞻雲

樓云繞樹銀花初試火隔簾香霧半垂鈎
盛秀才敏耕字伯年山居雜詠云花發臨
危岸鶯啼過遠林宵征云水暝螢光亂風
秋鴈語清又云衙晚催蜂去巢危促燕飛
贈張羽王云潮聲遶屋初消雪梅蕊知春
競放晴遊三台洞云石扉藤蔓迷樵路流
水桃花引客來送大安和尚歸廬山云送
客嶼頭防虎嘯逃禪樹底借枝封

卜長史鏗字子振送人還吳門云衰柳帶
煙迷遠浦片帆隨鴈下長洲遂閒堂云日
高臥榻茶煙細晝靜鈎簾樹色深

鄭太守宣化字行義九日燕邸遣懷云叢
菊自開吳地蕊踈磴故擣漢宮聲送安伯
惺之成安云蕭騷鬢爲風霜短拓落官驚
歲月流春寺讌集云海日倒銜天外影江
雲遙落坐中杯

萬明府夢桂字稚徵臘盡客蕪江云凍雲
仍易合殘雪未全消客愁云情淹黃絹字
身敝黑貂裘吳門有感云天青鴻鴈近水
長鱖魚肥程孟孺北上云池上墨花春霧
重閣中玄草錦雲長秋日過懷玉山下云
花沿石竇晴偏潤樹拂涼飈秋正分贈景
光父云長林風細花香暖古寺雲移月上
初

周明府元字長卿集宜遠樓云欄干千嶂
暝砧杵萬家秋過棲霞東之讀書處云六
代碑存誰幼婦百年書就恰名山

余祭酒孟麟字伯祥問胡太史病云閒身
稱病易春色閉門多集邀笛閣云花深雲
不去水闊月全低野興云褰衣經樹濕懸
榻待雲還過天界寺讀書處云花垂竹戶
遲歸燕書滿藜床落蠹魚早春喜晴登鳳

皇臺云草逢霽後留烟細花入春初抱日
明送楊道南入楚謁耿師云風塵傲世
偏壯貧賤藏名道益尊

焦貢士尊生字茂直寄子餘云病從秋思
得嬾任鬢毛蓬送周安陽云語向韓陵堪
片石跡陳漳水尚高臺白雲洞云千林落
日稀人跡一徑踈鐘散鹿羣燕子磯云微
風山郭酒帘動細雨江亭燕子飛泛舟秦

淮云踈雨乍迷桃葉渡冷風時度竹枝歌
閑居云抱瓮丈人時共井賣漿任俠舊爲
隣

謝秀才黃鐘字元聲焦山云沙市月明潮
似雪海門風起浪如雷賀余移居城東云
閉關領略溪山好擬易勾除月露才

徐公子邦寧字仲謚秋日庄居云樹密雲
來暝山深雨過寒日涉園云水翻細浪魚

銜藻露滴空堦鶴隱松牛首云寺靜野雲
穿石竇洞虛飛雨濕莓苔

張秀才振英潭西樓云松稍白月供長嘯
樓角青山伴苦吟

崔秀才士元字伯仁薄暮寶應湖云水邊
綠草依晴鷺岸上青林叫夕蟬

陳秀才弘世字延之冬日登清涼寺云林
枯千嶂削煙冷半江昏清涼山坐月云孤

亭全受月絕巘半沉煙獻花巖云雲歸一
巘白霜過半山紅送王曰常云惜別淹尊
俎含情悵管絃羅惟一移家冶城云委巷
樹深踈轍跡短墻花發燦棋枰

馬氏芷居陳石亭夫人苦雨云楊柳深藏
徑梨花靜掩門

僧來復字見心謝 太祖賜食云闕下彩
雲移雉尾座中紅芾動龍光

僧溥洽號南州應制題江東橋云浮鼉曉
渡江流穩役鵲晴瞻漢影遙

僧宗泐字季潭夢清遠兄云劇知情是妄
翻說夢成真往南陵云人煙千嶂裏客路
百花中間行云幽花不礙路偃木自成橋
天界寺僧果斌同諸官長遊牛首云官閒
何待隱僧老欲忘禪和沃州呂公云鳥棲
雲外樹龍護鉢中蓮

天界寺僧圓慧號秀峯夏日卽事云草閣
涼生今夜雨海榴花發去年枝

寬悅號臞鶴普德寺僧雲杜早發從潘景
升度歲云谷口梅花晴帶雪望中煙樹冷
孤邨春日山中寄景升云千樹夕陽啼暮
鳥一谿殘日掩寒扉

弘恩號雪浪報恩寺僧郭次父舍宅云江
山空姓字樓閣但雲煙宿箭闕云半嶺雲

生空翠合滿林花散曙煙封小橋望月云
一片清光孤玉笛千家烟樹亂踈鐘

吳山人擴字子克崔駙馬山池云帝女巧
將霞製錦仙人長以鵲爲橋長吟閣述懷
云城中藝圃甘遺世屋裡梯雲好看山

字品

杜太常環字叔循宋景濂稱其正書入能
品

陳中復工楷書

陳孟顥工楷書

朱孔陽洪武中以楷書名榜書更妙

朱銓字士選廼孔陽弟也 太宗文皇帝

選寫金經入翰林習書

江濬字子澄 仁廟潛邸召寫金泥字經

最眷注之

顧謙以楷書薦舉官主事

瑣事卷二
三九
蔣主孝工小楷

翟太常瑛字廷光作字運筆如飛結體流麗可愛

李太僕應禎字貞伯景泰癸酉舉人成化時有旨命寫佛經上疏言臣聞天下國家有九經未聞佛經近閱楊君謙外集集中載貞伯全疏

枕肱童士昂楷書遒勁有法

辣齋王尚文小楷工

馬郎中璫字公信法趙孟頫

紫芝黃謙字撫之行草遒勁古雅而榜書更妙

景前溪伯時初工真行後師周伯琦小篆頗得風骨

南原王欽佩真草清雅有法

東橋顧華玉真草皆清徹可愛

劉南坦元瑞法羲獻片紙隻字人得之爲至寶

顧英玉真草皆有晉人風味

徐子仁九歲作大書操筆成體正書出入歐顏大書初法朱晦翁幾亂其真後喜趙松雪筆力遒勁布構端飭成一家書至於篆字得法于異客更造闡奧西涯李相國白巖喬太宰時號篆聖見則吐舌下之曰

吾輩不及吾輩不及

周約庵子庚有王右軍風骨

王吉山子新學聖教序最擅書名但恨其過于圓熟耳

山農金元玉初法趙子昂晚年學張伯雨精工可愛落筆人便持去吳中文徵仲極喜元玉字凡得片紙皆裝潢成卷題曰積玉

石亭陳魯南法蘇眉山評者謂不減于吳
匏庵篆隸亦佳

玉泉陳伯羽行書筆筆晉人

馬南江呈道嘉靖二年貢士四體俱工極
有書學

邢太常一鳳字伯羽嘉靖辛丑進士及第
工篆書

顧寶幢清父法孫過庭筆力適勁古雅

馬鷺汀誠望刻意聖教序幼年者佳

橫厓陳子野法鍾王俊逸可愛

秋宇胡懋禮得意之筆酷似枝指生

雲涌盛仲交小楷法倪元鎮行書出入于
蘇米兩家古拙中有拔俗之韻隸字更優
有玄牘記一冊品題古今名帖

姚秋澗元白行書出入于黃山谷趙松雪
兩派而得于趙松雪者爲多

許石城仲貽工行書

楊虛游道南真草自成一家

金慕楨名魚乃赤松山農家學筆力稍軟
謝髯九子象出于蘇黃兩家筆力清硬
金蓉峰名元初字玄予行書有法有趣

何太吳仲雅工行書

畫品

靜誠陳先生遇善山水曾寫

太祖御容妙絕當時

陳中復靜誠先生弟繪事精雅幼年在靜
誠先生側戲弄筆墨靜誠叱曰吾豈他無
一長汝廼習其下者乎亦工寫照

史謹太倉人工繪事弱冠從軍滇陽洪武
末年有薦其才授應天府推官未幾左遷
湘陰丞遂流寓金陵自號吳門野樵長於
寒林雪景自題其畫云雨餘山色翠如苔

瑣事卷二
三五
樹杪寒烟濕未開童子無端掃紅葉隔林
知有故人來

張益字士謙號春庵永樂乙未進士喜寫
松竹與同榜夏杲同邸舍杲曰子當以文
名世墨竹小技宜讓我矣故春庵之畫最
少有畫法一卷藏于家

沈誠字文實別號味菜居士喜繪事興到
落筆自成一家

金太守潤字伯玉號靜虛工山水神會天
出傳世者絕少予曾見其長春龕卷廼公
宦遊所見呂洞賓故事

殷善字從善花木翎毛自呂廷振林以善
兩派中來殊有清致從善之子名偕能專
其業

傅禮字公緒與同時鄭春鄭堂皆善禽鳥
花木布景染色三人如出一手

馬俊字惟秀號訥軒山水倣唐宋人最古
雅獨以鬼神馳名

吳瑄字元玉號石居成化己丑進士官至
郎中山水法戴文進

李葵字誠伯見人繪畫輒能模倣雖百物
像貌無不曲盡

蔣子誠幼工山水中年悔其習遂畫佛像
觀音大士爲國朝第一手

許昂字世顛梅花清楚不俗

胡隆字必興蔣子誠門人工於神鬼陳魯
南贈之詩云生此南都住北都十年踪跡
遍江湖歸來爲憶當時事醉裡淋漓入畫
圖

史大方工山水謝子象題其畫云朱檣畫
舸繫神都翠篠黃茅覆酒壚好似石頭城
外景隔溪歌舞莫愁湖

史癡山水人物自寫胷中逸氣不可以畫
之常格求之

汪質字孟文浙人流寓南京山水專師戴
靜庵但用墨太濃耳

吳偉字魯夫一字次翁號小仙江夏人童
年流寓金陵工山水人物薦入仁智殿供
奉有畫狀元之稱臨繪用墨如潑雲旁觀
者甚駭少頃揮灑巨細曲折各有條理若

宿構然

山農金元玉畫梅花有逃禪老人筆意自
題絕句云一別西湖未得歸孤山風月近
何如春來賸有看花興又向君家寫折枝
金璿字元善號松居精於醫旁及繪事曾
寫袁安臥雪圖兄元玉題云一片堅貞天
地知甘貧豈但雪中饑平生恥作干人態
縱使天晴也不宜

嚴賓字子寅號鶴丘精於賞鑒與文翰林
徵仲交好最厚得徵仲畫百餘幅畫小景
酷似徵仲

蔣嵩號三松善山水人物多以焦墨爲之
最入時人之眼

九峯徐子仁雖不以丹青馳譽所畫松竹
花草蕉石皆精雅可愛

許縉字尚文工山水

馬稷字舜舉號醉狂善山水人物花木竹
石

薛仁字子良號半仙山水人物花草專學
吳小仙之筆半仙之號謙詞半於吳小仙
云耳

李著字潛夫號墨湖童年學畫於沈啓南
之門學成歸家只做吳次翁之筆以售緣
當時陪京重次翁之畫故耳謝子象題其

畫云銀河無路泛仙槎一舸空江此是家
殘月照人秋睡穩不知清夢在蘆花

秋碧陳大聲山水做沈啓南余藏送史廷
臣一小幀自題絕句云情深此日難爲別
相送元方又季方萬里楚江孤棹迴穩吟
秋色到維揚

景卿字夢弼善小景花草常寫杏花自題
絕句云晴團紅粉護春煙彷彿江邨二月

天記得踏青回首處一枝斜拂酒樓前

王子新畫法趙松雪得其神俊

黃珍字懷季花草有黃荃筆意

許通善畫牛可亂戴松之筆晚年自悔用
心之悞恐墮畜生道中廼專工佛像

林旭字景初少聰敏善畫山水品格甚高
尤精於傳真年未三十而卒

陳子野墨竹花草絕無一點俗氣文徵仲

稱其竹枝清氣逼人且戒門下士到南京
不可畫竹彼處有人蓋指子野

陳石亭六七歲便搦筆模倣古人之畫後
入翰林與文徵仲講論其畫更進凡宦游
所歷覽之名山大川皆圖成卷軸最得馬
河中夏禹玉之妙

鄒鵬字遠之號筠居工山水

盛安字行之號雪蓬居聚寶門外五聖巷
爲人梗介清約以梅花馳名詹景鳳云盛
行之畫梅豪縱而爽趣勝陳憲章王謙皆
不及

王孟仁字元甫山水清潤有法文徵仲極
喜之謝應午題其畫云吾愛王摩詰從來
老畫師鉛華渾欲洗墨韻自生姿踈樹秋
雲合孤舟晚鏡移煙江曾獨泛相對正堪
疑

胡憇禮山水脫去塵俗但所畫者不多耳
謝賓舉字子隱山水人物步驟于戴靜庵
可謂具體而微畫畢其兄子象卽題詩於
上子象贈子隱詩其略云圖成便索老醜
作每幅空處題一篇我詩借君畫增價君
畫資我詩并傳弟兄依附有如此人誇玉
樹芝蘭全

顧清甫究心禪理與高僧結西方社別號

寶幢居士家藏宋元名筆甚夥善雲山樹
酌米元章高彥敬而自成一家不受人潤
筆多畫與騷人衲子有百年智巧消磨盡
慚愧人傳粉墨痕之句余藏一軸清父題
五言絕句云策杖青林晚山寒雨濕衣野
雲仍有意相伴宿柴扉詩與字俱妙絕
雲浦盛仲交有逸才有妙賞博學多聞落
筆成詩文不煩點定家有小軒文徵仲題

曰蒼潤以仲交愛臨摹倪元鎮竹石取沈
啓南詩筆蹤要是存蒼潤墨法應須入有
無之句楊用修先生與之作記枯木竹石
可亂元鎮真跡

秋澗姚元白晚年工畫梅枝

楊秀才一洲字伯海山水小幅可觀好游
名山足跡幾遍五嶽人譏之云伯海手不
如脚曾寄謝茂秦山水圖茂秦荅之以詩

云畫逼輞川工王維信可同雲微天若遠
石斷水如空裂素寫能盡披圖意不窮相
知萬里合相望一書通神會江天月名傳
海嶽風君才變化裡吾道寂寥中猿鶴交
年久漁樵化歲豐懶時猶蔣詡 聖代豈
楊雄地勝閒多賦山靈暗有功寒暄依古
栢霜露感秋虫養拙聊幽事探奇奈老翁
丹青長在壁逸興滿蒿蓬

王秀才建極字用五工山水

何侍御仲雅工山水戲寫蘭竹最有清趣
胡宗信字可復山水最秀潤惜壽不永耳
史元昭工山水謝子象題其雲山圖云玉
芝堂前兩日雨問病無人不開戶東牆臥
對溪山圖雨滂雲蒸互吞吐畫師云是史
元昭心法妙傳公系祖高峰一二或可見
老樹千枝不能數微茫遠水通桃源劖拔

橫空類天姥林間一亭蒼翠深溪叟山翁
作亭主山中雨多溪漲添已隔漁郎在汀
浦洞口雲昏晝欲迷似阻樵人出幽塢巖
崖豹棲知變文雨晴出山西日曛
沈碩字宜謙號龍江長洲人流寓南京曾
學畫三年不下樓工于臨摹

姚太學衍舜字光虞工寫松枝
杜大成工草虫

齊庶人朱慶聚字仲賢號似碧山水與枯木竹石清雅可觀

盧氏名允貞字德恒號恒齋倪文毅公夫人白描精妙有九歌圖璇璣圖二卷藏於家文毅公曾孫蘄水令名民悅者曾出以示客予得以觀之

馬氏名閑卿號芷居陳魯南夫人善山水白描畫畢多手裂之不以示人曰此豈婦人女子事乎

沈氏沈宜謙女楊伯海妻工折枝花吳中黃姬水題其杏花云燕飛修閣簾櫳靜紈扇新題春思長妙繪一經仙媛手海棠生豔復生香

僧可浩號月泉靈谷寺住持畫蒲桃有生意不減溫日觀之筆豐坊南隅題其蒲桃云龍宮傾洞不可測下有七寶光琉璃老

師手掣千尺幹粒粒總是真摩尼掌取摩
尼和殼吸八部呼驚龍女泣醍醐入口冷
煖知醉臥青林滿身濕昔有大師名日觀
解圖蒲桃至今傳我師天機通道妙絕精
何代其無賢出定堂前如一戲四壁蕭蕭
風雨至從今福慧并圓明三界虛空青擊
碎南宮仙人初下馬欣然長歌爲師寫請
師持此詣靈山應道無非妄語者

廣禮號大鏡報恩寺僧陳子野授以畫竹
之法

曲品

馬俊小令不減元人

史癡工小令

陳全秀才有樂府一卷行于世無詞家大
學問但工于嘲罵而已

陳鐸有秋碧樂府黎雲寄傲公餘漫興行

于世咏閨情三弄梅花一闋頗稱作家所
爲散套穩協流麗被之絲竹審宮節羽不
差毫末

徐霖少年數遊狹斜所填南北詞大有才
情語語入律娼家皆崇奉之吳中文徵仲
題畫寄徐有句云樂府新傳桃葉渡彩毫
遍寫薛濤牋廼實錄也 武宗南狩時伶
人臧賢薦之于上令填新曲 武宗極喜

之余所見戲文繡襦三元梅花留鞋枕中
種瓜兩團圓數種行于世

陳魯南有善知識苦海回頭記行于世人
最膾炙者梅花序

羅子修雪詞絕妙

盛鸞有貽拙堂樂府二卷

邢太常一鳳字伯羽所填南北詞最新妥
入絃索

鄭仕字子學工小令

胡懋禮有紅線雜劇最妙同時吳中梁辰魚亦有紅線雜劇膾炙人口較之于懋禮者當退三舍

杜大成工小令有詞評一卷名納涼偶筆金鑿字在衡有蕭爽齋樂府最是作家華亭何良俊號爲知音常云每聽在衡誦小曲一篇令人絕倒

吉山王逢元最是詞曲當家

沈韓峯越工小令鐵面御史能作風流軟媚語賦梅花者豈獨宋廣平乎

盛壺軒敏耕工小令

石樓高志學秀才工小令

段炳字虎臣秀才和元人馬東籬百歲光陰一套金在衡見之極口贊賞曰押如此險韻迺得如此妥帖乎足以壓倒東籬

張四維字治卿號五山秀才有溪上閒情
藏于家友人刊其雙烈記章臺柳兩種戲
文行之

黃方胤有陌花軒小詞

詩話

南原王韋秀才時夢中聞人誦兩句詩云
起來小步傍闌干花霧襲衣寒氣重及中
弘治乙丑進士閣試庶吉士以春陰爲題

南原憶夢中語遂寫入詩中主試李公批
二句有神助儲靜夫索南原詩看讀至朱
樓十二晝沉沉畫棟泥蝠燕初乳擊節歎
賞曰絕似溫李絕似溫李陸儼山在坐迺
曰分明王韋何止溫李蓋指姓名以戲之
也坐中皆笑

湯公讓幼年在府學恃才負氣府尹傳籌
不到責以十板遂棄其中服題詩府門合

扉有云從今袖却經綸手且向江頭理釣
絲之句後以薦官至參將有東谷集

山人徐霖 武宗皇帝 召命禁直霖作

詩紀之云久嗣函風學老農聖恩忽漫起
踈慵身離陸海三千里目睹天門十二重
封禪無書何獻納清平有調幸遭逢臨流
久洗巢由耳也許來聽長樂鐘及放歸作
詩云放歸吾願遂計日便還鄉免上乞骸

疏將求辟穀方無心判恩怨有道管行藏
耿耿思君念他生亦不忘夫霖以布衣

召對除夕應制百韻立成雖雅俗並陳詞
多譎諫在 帝左右從容顧問游從竟日

夕可謂不世之奇遇 武宗屢命以官辭
而不拜終更事變拂衣遂初冥鴻高騫弋
人徒慕此其人豈與嗜甘腐鼠蹇裳濡足
卒與禍會者同日語哉旣歸而名益震詞

翰益奇又幾二十年竟以隱終

楊用修王元美二公品題梅花詩皆取杜
子美幸不折來傷歲暮若爲看去亂鄉愁
李商隱玉鱗寂寂飛斜月素手停停待夕
陽此論一出却令淡煙踈影之句頓爾減
價吾鄉黃吏部首卿有句云野客佩寒星
欲墮佳人釵煖日初融焦弱侯翰林有句
云花開幕雪人歸後香滿寒庭月上時一

似商隱一似子美

蘇侍御舜澤咏西關梅云此日韶華開禁
苑向來吟思遶江干吾鄉謝與槐極口賞
咏之

楊伯海誦鄉先生咏枯木一聯云有枝撐
曉月無葉響秋風句頗清致今不記爲何
人之作姑載於此

楊穀上元尹以苦役役其父兄穀往訴之

尹以衣巾生員爲題令其作詩蓋輕之也
穀援筆成詩尹見其草中射虎心空在天
上屠龍事已非之句遂免其役

顧東橋公填楚三司請遊黃鶴樓先磨一
石飲後乞公留詩東橋在輿中已得雲荒
赤壁周瑜壘江繞青山夏禹祠二句遂援
筆書石上云黃鶴仙人身姓誰空傳崔灑
舊題詩雲荒赤壁周瑜壘江繞青山夏禹
祠浮世古今堪灑淚高臺歌舞幾銜卮天
寒月白孤鴻遠徙倚闌干送目遲三司皆
服其工

何太吳淳之中萬曆癸未會魁未及殿試
告病歸同榜殷都送之以詩有句云收來
駿骨還歸市畫就蛾眉不入宮可謂事切
而語工

姑蘇劉翰林城字玉儔在南京讀書時攜

酒邀沈重巽惟申盛時泰仲交同遊清涼
寺上環翠閣觀壁間諸詩玉儔因以佯狂
張藏虺爲韻苦仲交仲交卽走筆書壁上
云三人閣下共徜徉此日風流壓楚狂讀
書不數鄭監稅任俠那誇許少張風生虎
向谷旁吼霧盡豹豈山中藏從來陸雲最
文弱休咲形貌多羸虺詩成二君吐舌相
視

吳擴字子充崑山人少喜爲詩歌有聲吳
中以布衣游縉紳間玄冠白裕吐音如鍾
每對客多言平生游武夷憇匡廬人天台
鴈宕諸勝事朗誦其所賦詩聽之者如在
目中嘉靖年間以避倭寇挈家來金陵愛
秦淮一片水造長吟閣居之曾元日賦一
詩懷嚴介溪相國友人戲之曰開歲第一
日懷朝中第一官如此詩情便到臘月三

十日豈能懷及我輩乎坐客皆大咲李于
鱗古今詩刪取子克崔駙馬山池一詩云
平陽池館接青霄閨苑瀛洲路不遙帝女
巧將霞製錦仙人常以鵲爲橋樓前疊石
雲生座洞裏探梅雪滿條詞客慣來陪賞
洽月明酣聽鳳皇簫

余喜孫太初贈劉坦翁一聯云閉門句好
香殘後搗藥聲高月上初友人張子明云
此句有清趣格迺晚唐耳且閉門句好兩
事也搗藥聲高一事也對之殊覺不工余
深服其論

金大輿自誇吳中友人所贈之詩云家散
千金盡詩成萬口傳可謂說盡生平金魚
聞其語因戲之曰家散千金是矣足下曾
濟人利物乎試添二字何如家散千金盡
爲甚詩成萬口傳何曾大輿遂拂衣去

盛仲交游祈澤寺從佛龕中得弊紙上書
詩一律云研池蒲座落花香墨透織毫染
漢章靜臥衲衣雲似水高懸紙帳月如霜
梧浮野渡魚龍遠錫振空山虎豹藏幸對
爐煙坐終日煮茶清話得徜徉友人褚偁
呈雪庭法師座前清覽洪武辛亥暮春書
清隱小軒偁字本中不知是金陵何許人
也

吳中黃淳甫與姚元白盛仲交在竹素山
房擁爐分韻賦春雪仲交得韻點筆成詩
淳父索觀仲交不與咲曰若先飲一卮迺
可觀淳父遂飲一卮仲交詩云三冬寒始
盡初陽氣尚微誰言六出後猶作五花飛
入柳驚棉早粘梅訝蕊肥座中同詠客誰
是謝玄暉二君極喜誰言六出後猶作五
花飛二語之工

王逢元詩爲字畫所掩余三十年前集其
詩百首張羽王見而愛之欲草一序刊行
竟爾不果今偶得其二詩遂錄之和人無
題云晴綻東墻杏子紅露溥南內牡丹蘂
承恩未必因詞客捐寵何勞怨畫工獨聽
遠鷄啼曉月幾隨孤燕領春風瓊窻寂寂
眠初定夢見笙歌在別宮又云兩日閒心
夢裏寬一春花事雨中殘垂楊不解青絲

結明月先虧白玉盤琴調思長和淚鼓鏡
銅衰盡帶愁看頻過女伴顛狂甚故着羅
衣刺合歡

羅敬叔云昨從休寧令丁元父扇頭見焦
弱侯一詩有別來野老頻爭席歸去門生
半在樓之句門生何必在樓乎殊爲未愜
余戲之曰君自不讀書迺議焦爲杜撰乎
此句用陶弘景三層樓故事敬叔勃然面

赤者久之敬叔名治南昌人

周潔字玉如家江東城南隅胭脂巷中年
十四父周碧山遣侍京兆張羽王羽王棄
官歸不數年寄詩一冊名雲巢詩晚晴云
夕雨愁無極斜陽喜乍開樹披殘靄出山
挾斷雲來的歷穿花逕逶迤過渚臺更須
林月上清賞一追陪江邊思家云北望一
含愁歸心俯碧流灘雖注南海湘亦接巴

丘天闕當牛斗臺城枕石頭儂家生長地
終歲信悠悠秋山云聞道秋山好重巖濕
已消沙頭文舫待石上白雲招喜探飛瓊
篆羞吹弄玉簫桂岑多勝槩不數赤城標
立秋云白帝嚴金駕乘風下紫微德惟宣
湛露令卽屏炎暉乍警青桐落將催赤鴈
飛何須賦團扇恩顧似君稀喜雨云入伏
炎難度迎秋雨乍行新涼增雅咏甘澍滿

歡聲甫脫衝波厄那堪憫旱情吾家安石
喜恐亦爲蒼生登樓云憑欄一望白雲重
松竹蕭森裊露濃樹外連灘流不斷依稀
如聽秣陵鐘戲諸姊作假花云鏤花雕葉
百般新巧手分明遂奪真自是深閨無定
鑿金錢輸與弄虛人秦淮云秣陵無處望
灘水正前流何不教東下將心到石頭夢
還京云自去長干側終年桂嶺西新秋望
鄉處無奈白雲迷憶父云憶昔當殘臆還
家雪正飛三年無一字不忍見鴻歸思母
云慈母頭已白忍見綠萱開空號忘憂草
偏令首重回傷長姊云花落空縈恨鶯啼
更助哀芳魂似流水一去不重回中秋賞
月憶諸弟云本共一枝生誰知各南北今
逢三五時會爾何能得觀此數詩固江東
一才婦也

徐姬詠楊花云楊花厚處春陰薄清冷不
勝單夾衣吳中徐昌穀極喜其句作一詩
賞之

妓朱斗兒號素娥與陳魯南聯詩有芙蓉
明玉沼楊柳暗銀堤之句人多誦之送所
懽于江干題一絕云楊子江頭送玉郎離
思牽挽柳絲長柳絲挽得吾郎住再向江
頭種幾行又托所懽買束腰其人書問尺

寸朱荅之云寄買紅綾束如何問短長妾
身君抱裏尺寸細思量鳳陽劉望岑嘗訪
素娥素娥不出乃投一絕云曾是瓊樓第
一仙舊陸鶴駕禮諾天碧雲縹緲剛風惡
吹落紅塵四十年素娥欣然見之

舊院妓趙四號燕如荅人寄吳箋云感君
寄吳箋箋箋上雙飛鵲但效鵲雙飛不效吳
箋箋薄

趙氏小妓十四能詩客命作寄情詩以床
字爲壓女吟云思君君不見明月照牙床
徐翩翩舊院妓友人誦其紅拂當年事青
樓此日心之句余曰徐姬已辦走路矣後
竟從良去良人歿削髮爲尼

舊院妓湘蘭馬守真詩云自君之出矣不
共舉瓊卮酒是消愁物能消幾個時何減
唐之魚玄機李季蘭乎湘蘭死吳中王穉

登挽之云歌舞當年第一流姓名贏得滿
青樓多情未了身先死化作芙蓉也並頭

石榴裙子是新裁疊在空箱恐作灰帶
上琵琶絃不繫長干寺裡施僧來不待

心挑與目招一生孤負可憐宵祗堪罰作
銀河鵲歲歲年年只駕橋黃金不惜教

嬋娟歌舞于今樂少年月榭風臺生蔓草
鈿箏錦瑟化寒煙明珠綴在鳳頭鞋白

璧雕成燕子釵換得秣陵山十畝香名不
與骨俱埋 舞裙歌扇本前因繡佛長齋
是後身不逐西池王母去定隨南岳魏夫
人 水流花謝斷人腸一塋金釵土盡香
到底因緣終未絕他生還許嫁王昌 平
生猶未識蘇臺爲我稱觴始一來何意倏
然乘霧去舊時門戶長青苔 佛燈禪榻
與軍持七載空房只自知試向金籠鸚鵡

問不曾私蓄賣珠兒 蘭湯浴罷淨香燻
冉冉芳魂化彩雲遺蛻一坯松下土只須
成塔不須墳 紅牋新擘似輕霞小字蠅
頭密又斜開篋不禁沾臆淚非關老眼欲
生花 描蘭寫竹寄卿卿遺墨都疑淚染
成不遇西川高節度平康浪得校書名

畫談

戴文進永樂初年到南京將入水西門轉

時之際一肩行李被脚夫挑去莫知所之
文進雖暫識其人然已得其面目之大都
遂向酒家借紙筆畫其像聚衆脚夫認之
衆曰此某人也同往其家因得其行李
汪肇號海雲休寧人山水人物出入于戴
文進吳次翁但多草率之筆曾來南京悞
附賊舟值祭江神約夜間劫掠一太守舟
欲汪備數汪不逆其意自陳善畫開廂取

扇以示無物人各畫一扇贈之及飲酒用
鼻吸飲又做戲事以娛勸之賊首不覺沉
醉遂悞其事次日因捨舟就陸而行常自
負作畫不用朽飲酒不用口云

吳小仙春日同諸王孫游杏花村酒後渴
甚從竹林中一老嫗索茶飲之次年復與
諸王孫遊之老嫗已下世數月小仙目想
心存遂援筆寫其像與生時無異老嫗之

子得之大哭不休

朱朗字子朗文徵仲得意門人徵仲應酬之作多出於子朗手金陵一人客寓蘇州遣童子送禮于子朗求徵仲贖本童子誤送徵仲宅中致主人之意云云徵仲笑而受之曰我畫真衡山聊當假子朗可乎一時傳以爲笑

文伯仁衡山之猶子畫名不在衡山下好使氣罵坐人多不能堪寓棲霞寺白鹿泉庵中數年有東山徐姓者禮請伯仁至家水閣上作畫水閣卽臨太湖賓主相談微有不合伯仁遂掀拳大罵徐隱忍不過迺曰文伯仁在我家敢如此無狀今投爾于太湖誰得知之急呼家僮數人來縛伯仁計無所出長跪求免徐據上坐以大石壓頂歷數其生平而唾罵之伯仁唯唯而已

迴免爲魚鱉餌

文伯仁幼年與叔徵仲相訟囚於囹圄病且亟夜夢金甲神呼其名云汝勿深憂汝前身迴蔣子誠門人凡畫觀音大士像非齋戒不敢動筆積此虔誠今生當以畫名于世也醒來殊覺病頓愈而事亦解矣此伯仁親與余言者

蔣子誠工神鬼江寧縣志載其一事云潘爛頭居驍騎營中相傳因雷火焦其額遂瘡爛竟不愈故號曰爛頭每出羣兒買雷每錢一文以指染頭爛處取膿少許書雷字羣兒手中行數步開手卽雲氣上衝轟然有聲病者索符亦以膿書之或懸于門或火灰而服之卽愈爛頭浼蔣子誠作瘟元帥像久弗與一夕召瘟帥遣至子誠家子誠交睫輒見元帥未幾像成爛頭見而

訝之曰神像舊所懸金字牌上書出入天
門此像君何易曰無拘霄漢子誠曰豈敢
擅易之耶旬日每夕吾見神像所懸者如
此爛頭悟自是天下始改牌面皆曰無拘
霄漢云

陸治字叔平號包山吳諸生工于寫生能
得徐黃遺意曾見畫一丫蘭寄吾鄉盛仲
交自叙云廣南梁中舍遺我丫蘭品質異

常隨其感遇賦詩一絕得六首 每莖十
六花花各一丫云不與秋蘭並九英仙艷
二八自天成祇緣無力禁香重幻作翫支
駕玉莖 心帶微紅迎風舞動云新裁魯
縞紵秋衣肌骨冰瑛酒暈微獨立嫣然風
自舉低回翻學舞容璣 花枝應節六葉
藜生云玉戟稜稜應節分枝枝柔玉紉香
雲凝粧擬待三更月露染生綃六幅裙

瓣若輕綃色帶青黃云方空輕翼竊青黃
製得霓裳稱淡粧香抱幽懷嬌不語含情
如欲待迎將 直幹玉立露下尤香云亭
亭浴露立西清淡薄秋容幻態輕獨有檀
心禁不得一庭香思動蜂嬰 葉過三尺
花多曉發云三尺丰標高髻粧兩行釵玉
一匳香朝朝擬待煙屏展徐攬輕羅上畫
堂

鄒鵬家貧資畫以養母一日兩青衣到門
自陳主人商於蕪湖特請畫卷軸圍屏先
奉白金五兩權辦薪米安家遠之持以問
母母喜曰汝速去是汝運通時也遂別母
同兩人登舟行三日遠之忽疑曰吾聞蕪
湖風便半日可到那得有三日程乎兩人
曰實不敢誑吾主人家在鄱陽湖恐以路
遠不行故托言蕪湖耳遠之業已在路無

可奈何只得隨行至湖上又陸行數里到
其住處主人相見禮意殷勤飲食豐潔令
四僮相伴小室中作畫數日後偶閒步窺
其廳事見主人金冠紅袍收諸豪客貨物
廼知爲綠林長因速完其畫以情告歸主
人曰汝貧人留此亦不惡遠之對以家有
老母欲歸慰倚門之望遂厚贈之遣人送
至上新河遠之歸家對母痛哭云云後無
事只閉門凡有求畫者必熟其聲音方與
之相見

雲浦盛時泰高才博學有聲場屋學畫雲
山于寶幢居士顧源一日寶幢雲浦同聚
僧舍友人陳泰華舉蔡中郎戲文中二語
嘲之曰雲浦雲浦大丈夫當萬里封侯怎
肯守故園空老蓋故園之音與顧源同也
一坐皆笑

金靜虛先生在南安太守府中古廟前有
空心枯樹一株忽乞食道人坐于樹中遂
發生枝葉感動郡人觀者如市道人忽不
見追思道人布袍上有補痕宛成呂字知
是洞賓顯化靜虛先生異其事畫成一卷
名曰長春龕題詩者三十餘人予從市上
買得盛仲交借去未還

吳小仙飲友人家酒邊作畫戲將蓮房濡
墨印紙上數處主人莫測其意運思少頃
縱筆揮灑成捕蟹圖一幅最是神妙
林奴兒號秋香成化年間妓風流姿色冠
於一時學畫于史廷直王元父二人筆最
清潤從良後有舊知欲求一見因畫柳枝
于扇寫二十八字以拒之云昔日章臺舞
細腰任君攀折嫩枝條從今寫入丹青裏
不許東風再動搖

妓朱素娥山水小景得陳魯南授以筆法
更入作家一聞魯南選入翰林庶吉士盡
以平日往來詩畫尺牘緘封寄與魯南上
寫云昨日個錦囊佳句明勾引今日個玉
堂人物難親近卽此一舉素娥之風流儒
雅可占矣

